

Date – 15/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Mizorama Local Council leh Village Council inthlanah party malin sorkarna an siam theih lohna hmun 117 a awm.**
- 2. Chakma Autonomous District Council huamchhunga Village Council inthlan vote thlak chu thla leh March ni 12 ah neih a ni dawn.**
- 3. President Draupadi Murmu chuan ramchhung hmeichhia te theihna a sang chho zel a ti**
- 4. Prime Minister Narendra Modia chuan hlawhtling taka ram pahnih US leh France a tlawh hnuah nizan khan India a lo thleng.**

<><><>

SEC REVIEW

Mizoram State Election Commission tarlan danin Local Council leh Village Council inthlan neih zawh takah party malin sorkarna an siam theih lohna hmun 117 a awm.

State Election Commission Secretary Pu K. Laldingliana sawi danin Village Council 554 leh Local Council 110-ah inthlanna hi neiha ni a, hetah hian ZPM chuan Local Council leh Village 321-ah sorkarna an siam a, MNF in 149-ah sorkarna siamin Indian National Congress chuan 57 ah an siam bawk, heng bakah hian Independent sorkar siamna hmun 9 a awm bakah BJP sorkar siamna hmun 1 a awm bawk.

<><><>

CADC ELECTION

Mizoram State Election Commission chuan Chakma Autonomous District Council huamchhunga Village Council inthlan chu thla leh March ni 12 anih thu a puang.

Mizoram State Election Commissioner Dr. H Lalthlangliana chuan nimin khan a pisa-a thuthar thehdarhtute kawmin he thu hi a sawi a, inthlan puan a nih atang hian CADC huamchhungah election model code of conduct kenkawh nghal a nih thu a sawi a, State Election Commissioner chuan CADC hnuai Village Council chhunga In 50 awm chinin VC seat thum an neih thu leh In 50 atanga 100 inkarin seat 5 an neih thute bakah In 101 atanga In 150 in seat 6 leh In 151 atanga a chunglamin seat 7 zel an neih theih thu te a sawi bawk.

Mizoram State Election Commission tarlan danin CADC huamchhunga Village Council-a ding turte hming pek luh hun hnukung ber atan tun thla

February ni 19 ruat a ni a, hming pek luh te endikna hun atan February ni 21 ruat a nih bakah hming pe lut inhnuk kir duhte tan February ni 24 thleng hun pek an ni a. CADC hnuai Village Council-a vote tla te hi vote thlak ni vekah chhiar fel a ni dawn a, vote thlak that ngai a awm a nih chuan vote thlak tuk March ni 13-ah neih that leh tura ruahman a ni a, March ni 17 a VC tinte inpeih fel vek tura tih an nih bakah a tuk March ni 18-ah VC thlan leh a kaihnawih pawh zo fel vek tura ruahman a ni bawk.

Chakma Autonomous District Council E-Roll thar berah vote nei thei mi 37,883 an awm a, hi mipa 19,162 leh hmeichhia 18,721 an vaiin mi 37,883 an awm a, chhungkua 16,991 awm ang a chhinchhiah a ni.

CADC huamchhungah hian Village Council seat 88 a awm a, General seat 428 leh Reserved seat 88 a awm a, CADC hnuai VC seat awm zat chu a vai a belhkhawmin seat 516 a ni.

CADC huamchhunga Village Council lian ber chu Kamalanagar-I niin hetah hian voter mipa 840, hmeichhia 838, a vai a belhkhawmin mi 1678 an awm a, chhungkaw 725 awm ang a chhut a ni bawk. Chakma Village Council te ber chu Gobasuri niin hetah hian chhungkaw 60 an awm a, voter mipa 58 leh hmeichhia 56 an vaiin 114 an awm a ni.

<><><>

LAWNGTLAI WATERMELON

Lawngtlai East bialtu MLA, Adviser to Chief Minister, Dr.Lorrain Lalpekliana Chinzah chuan KVK, Lawngtlai hmalakna chhuanawm a tihthu a sawi.

KVK, Lawngtlai ten National Initiatives on Climate Resilient Agriculture Project hnuai ah Lawngtlai bul Tuiphal zauva Kuthnathawktute Dawnfawh an chintir chu Adviser to Chief Minister ho hian seng tan a ni a, Dr.Lorrain Lalpekliana Chinzah chuan sik leh sa inthlak danglam nasa chu kuthnathawktuten an tawrh nasat vanga, an inherrem theih nan a KVK mithiam ten kaihhruaina thatak nen kuthnathawktute an enkawl chu chhuanawm a tih thu sawiin, Lawngtlai District a kuthnathawktu ten KVK mithiamte behchhana hna an thawk thin chu uar deuh deuh tul a tih thu a sawi.

Tuiphal zau-va Dawnfawh sengna ah Adiviser to Chief Minister hi Dr.C.Lalfakawma Senior Scientist & Head, KVK, Lawngtlai leh Horticulture Department hotute leh thawktu dangten lo dawngsawngin, Lai Autonomous District Council a MDC pathum Pu L.R Dingliana Chinzah, Pu V.Zathanga leh Pu Lallawmsanga Apetow ten Adiser to Chief Minister hi an tawiawm.

Dr.C.Lalfakawma NICRA project hnuai ah Poly mulching cultivation of Water melon chu kumdangah pawh hlawhtling takin an lo kalpui tawh tih sawiin, kuthnathawktuten KVK kaihhruaina thataka zawmchunga hna an thawhpiahlam ah hlawk zawka thlai an tharchhuak thin chu thil lamwawm tak a ni a ti a, ram hruaituten an hnathawhte a hmunah an hmuhpui thin chuan anmahni ah pawh phurna nasa taka a siam thin thu a sawi.

<><><>

KOLASIB FIRE PREVENTION WEEK

Kangmei ven hapta (Fire Prevention Week) chu nimin khan Kolasib DC Pu Robert C. Lalhmangaiha, District Level Committee on Fire Prevention Committee Chairman ni bawk chuan Kolasib Parish Hall ah a hawng.

He hunah hian DC chuan thu sawiin, ramkangin sik leh sa leh khawchin thleng in a ti danglam vek thei a ni, a ti a. He kangmei venna hi sawrkar mawhphurhna chauh ni lovin kan zavai atan a ni, tiin, chumi venna atan chuan mitin an pawimawh a ni, a ti.

Kolasib DFO Pi Jenny Sailo chuan nikum chungh khan an dist chungah Fire Prevention Awareness hrang hrang kalpui in, khaw hrang hrang te nen tangrual in hmalak a ni a, Mizoram pumah Fire Prevention a ti tha ber District an nih theih phah a ni, a ti. Kuminah pawh District Level Fire Prevention Committee te thukhawm leh in Fire Prevention atana hmalakna tur hrang hrang sawiho a ni a, Kangmei Venna chungchang thehdarh te, meikawng sial te , lo hal hun tur bituk (march ni 31 hmalam) te, Kangmei venna kawnga titha khua te lawmman siamsak leh khaw hrang hrang te nen a thawkho a hmalak leh tum a ni,a ti.

Fire Prevention Week puala thutiam sawi rual na te leh Kangmei Venna kawnga Article inziahsiakna a ti tha zualte lawmman semna hun te hman a ni.

He hunah hian mi thahnem tak kalkhawm in, Forest Department leh Kolasib a Head of Offices te, DIET Kolasib zirlai te, Kolasib Venglai zaipawl te, Khawtlang leh NGO aiawhte leh sawmbik mi pawimawh te an tel a ni. Kumina Fire Prevention Week atana thupui hi,' Kangmei ven hi kan tu leh fa te hmakhua atan a ni' tih a ni.



KOLASIB ROAD SAFETY

Kolasib SP Pu David H. Lalthangliana chuan Kolasib Diakkawn ah lirthei khalh fimkhur in zirtirna thla (Road Safety Month) nimin khan a hawng a, he hun hi Pu Benjamin Lalhmingsanga, District Transport Officer chuan a kaihruai.

Pu David H. Lalthangliana chuan Road Safety Month hawanna hun hman hma pawh in tun thla tir atang khan Traffic Police leh MVI te chuan lirthei endik hna chu uluk leh zualin an lo kalpui tawh a ni, a ti a, mipui an him tlan zawk nana inzirtirna leh fimkhurna kawnga hmalakna uar zawka a kal theih nana a thla bila siam a ni, a ti.

SP chuan, Traffic dan bawhchhia hremna pawh a san tawh viau thu sawiin, a khalhtu tur nilovin motor a khalh te, rui chung motor khalh te, naupang kum tlinglo motor khalh te, phone hmang chung motor khalhte leh document felfai lova motor khalh te chungah thuneituten dan hmangin hremna an lekkawh dawn a ni, a ti. Road Safety month ti hlawhtling tur chuan mitinten anmahni zawn theuh ah sawrkar in kan him zawk nana dan a siam te kan zawm a pawimawh takzet a ni, a ti.

SP hian tarlan danin kum 2023 chhung khan Kolasib District ah lirthei chetsualnaa thi mi 15 an awm a, kum 2024 ah mi 8 awmin kum 2025 ah vawiin thlengin mi 1 an awm a ni, a ti.

He hun hmanah ah hian Kolasib SP bakah Pu Robert C Lalhmangaiha, Kolasib DC; Kolasib a Head of Offices te, Kolasib Police leh Traffic official te, Kolasib a Drivers leh Vehicle Owners aiawhte leh khawtlang mipuite an tel a ni. He hunah hian Road Safety Week puala thutiam sawi rualna hun hman a ni bawk.

<><><>

CSAB PRESS CONF

Sorkar laipui hnuai Central Seat Allocation Board hotute chuan Mizo thalai tam zawk India rama zirna in tha-a an luh theih nan puih an inhuam reng thu an sawi.

He thu hi nimina Aizawl Press Club-a thuthar thehdarh tute an kawmnaah sawiin CSAB hotute chuan Hmar chhak zirlaite'n India rama zirna in tha National Institute of Technology hnuai NIT+ system hnuai seat 2000 chuang an neih an beisei thu an sawi a, Mizo zirlai a bik takin science leh technical lama kalte chu Joint Entrance Examination (JEE) 2025 hmachhawn tur leh hemi atana an hming pe lut theuh tura an duh thu an sawi bawk.

CSAB hotute chuan Mizo zirlaite chu rampum anga chhut pawh a thiamna leh theihna nei tha tak an nih thu sawiin, tumruhna leh thawhrimna nena India ram chhung zirna in tha a lut ve ngei tura an duh thu an sawi a, hemi kawnga an inbuatsaihna ah harsatna leh hriatthiam loh an nei a nih chuan an tan an awm reng thu an sawi a, counselling pawh hmarchhak zirlaite tan an hawn thu an sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

PRESIDENT

President Draupadi Murmu chuan ramchung hmeichhia te theihna a sang chho zel a ti. International Women's Conference vawi 10-na Bengaluru-a neih a hmanpuinaah he thu hi sawiin Pi Murmu-i chuan hmeichhiate chu tum sang tak nei tura sawmin huaisenna, chakna leh theihna sawm khawm a an tum ram hlen chhuak turin a chah a. Rilru lam hriselna chu hmeichhiaten nun awmze nei an neih theih nana a bulthut a nih thu a sawi a ni.

<><><>

PM MODI

Prime Minister Narendra Modia chuan hlawhtling taka ram pahnih US leh France a tlawh hnuah nizan khan India a lo thleng.

Prime Minister Narendra Modia hian President Donald Trump-a sawmna angina US hi a tlawh a. President Donald Trump nen White House, Washington DC-ah an inkawm a. Pu Modia chuan Firfiakte do turin India leh America-te chu nghet takin an tangdun a tih sawiin ramri kana firfiaka chetna chu chak takin an do zel dawn a ti a.

Prime Minister Modia chuan India leh US thawhdunna chuan khawvel tha zawk a siam thei tih sawiin ram pahnih ten an inlaichinna chu tihlen an rem ti a ti a. Technology hmanga thiamna leh theihna te tangkai taka hman an tum tih sawiin hemi hnuaiah hian mineral pawimawh bakah bungraw tha leh damdawi siamna lam hmanruate tam zawka inpek kual dan tur ngaihtuah a ni ang a ti a. Prime Minister Modia chuan India-in ram venhim hna a thawhna kawngah America chu a pawimawh hle a ni a ti a.

India leh US chuan kum 2030 ah chuan an insumdawntawanna chu dollar tluklehdingawn 500 chuanga tihlen an remti tih sawiin Los Angeles leh Boston-ah Indian consulate thar hawn anih tur thu a puang bawk a ni.

President Donald Trump pawhin India leh US ten thawhdunna tur pawimawh tak tak an siam thar tih sawiin US leh India inzawmna chu a danglam bik a ni a ti a. Energy lamah inremna siam niin US chu India-a oil leh natural gas thawnluttu lian ber a ni dawn a ti bawk. Khawvela sumdawanna kawng lian ber tur India-MiddleEast-Europe Economic Corridor siam turin inremna an nei a ti bawk.

Tun tum hi President Donald Trump-a lakluh anih hnuaiah Prime Minister Narendra Modia'n US a tlawh hmasa ber a ni. France a tlawh chungin PM Modia hian AI Action Summit, Paris-a neih a hmanpui a. Marseille-a Indian Consulate thar a hawng bawk a ni.

<><><>